

『日本書紀』25 白雉元年二月甲申条

甲申。朝廷隊仗如元會儀。左右大臣。百官人等。爲四列於紫門外。以粟田臣飯虫等四人使執雉輿。而在前去。左右大臣乃率百官及百濟君豐璋。其弟塞城忠勝。高麗侍醫毛治。新羅侍學士等至中庭。使三國公麻呂。猪名公高見。三輪君甕穗。紀臣乎麻呂岐太四人代執雉輿而進殿前。時左右大臣就執輿前頭。伊勢王。三國公麻呂。倉臣小屎。執輿後頭置於御座之前。天皇即召皇太子共執而觀。皇太子退而再拜。使巨勢大臣奉賀曰。公卿百官人等奉賀。陛下以清平之德治天下之故。爰有白雉。自西方出。乃是陛下及至千秋萬歲。淨治四方大八嶋。公卿百官及諸百姓等。冀罄忠誠勤將事。奉賀訖再拜。詔曰。聖王出世治天下時。天則應之。示其祥瑞。曩者西土之君。周成王世與漢明帝時。白雉爰見。我日本國譽田天皇之世。白鳥櫛宮。大鷦鷯帝之時。龍馬西見。是以自古迄今。祥瑞時見。以應有德。其類多矣。所謂鳳凰。麒麟。白雉。白鳥。若斯鳥獸及于草木有符應者。皆是天地所生休祥。嘉瑞也。夫明聖之君獲斯祥瑞。適其宜也。朕惟虛薄。何以享斯。蓋此專由扶翼公卿。臣連。伴造國造等。各盡丹誠奉遵制度之所致也。是故始於公卿及百官等。以清白意敬奉神祇。並受休祥。令榮天下。又詔曰。四方諸國郡等。由天委付之故。朕總臨而御■（六+禹）。今我親神祖之所知。穴戶國中。有此嘉瑞。所以大赦天下。改元白雉。仍禁放鷹於穴戶境。賜公卿大夫以下至于令史各有差。於是褒美國司草壁連醜經授大山。并大給祿。復穴戶三年調役。